

LUTO DI MUNDO MUSICAL ARUBANO

E siman aki ta e siman caminda cu sector musical di nos isla a haya su golpinan.

MARIA DE FREITAS

Tabata durante parada di carnaval cu noticia a plama di morto di **Sra. Marie** (Maria Roselind de Freitas), mama di e popular **Carlos y Errol de Freitas**, esposa di e masha conoci ex comerciante **Carey de Freitas**.

Pa mundo musical esaki tabata un golpi debi cu masha hopi musico y personanan den farandula riba nos isla tabata huesped den cas cerca Marie y Carey, no como amistades y conocirnan di e yiunan, pero pa Marie y Carey mes, pa locual nan tabata pa tur hende.

Durante Festival di Roadmarch, nos a mira Carlos tras di control tecnico na momento di presentacion di **Taxx**.

Un persona a comenta, "**ki mishe aki y su mama ta asina malo ?**". Mi contesta tabata na e persona aki: "**si bo conoce e mama, esaki lo tabata locual e lo a desea, esta pa Carlos ta para tras di e control aki**".

Si durante e parada di carnaval nos mester a mira Errol mes riba truck cu su banda, ami sigur lo a compronde e motibo cu e tey.

"Esaki ta locual su mama lo a desea".

Awe tardi entiero di Sra. Marie lo tuma lugar na San Nicolas y sigur ta cu hopi lo ta esnan cu lo acompaña pa su ultimo lugar di sosiego.

Un **"mama remarcable"** pa tur nos musiconan.

ETY WILLEMS

Manera cu nos ta yegando den final di celebracion di carnaval a drenta e noticia di morto di **Ety Willems** (Dionisio) **drechador di acordeon**.

Ety no tabata solamente un drechador di acordeon, pasobra si e tabata tin e equiponan necesario, e lo tabata e trahador di acordeon di nos isla y sigur pa otro islanan y paisnan, cu e experticio cu e tabata tin.

No tin un persona riba nos isla cu acordeon cu no tabata conoce Ety y ora cu nan tin problema cu acordeon ta acerca Ety pa drecha e instrumento musical.

Ety tabata asina experto cu hasta e tecladonan e tabata traha (no drecha so, pero traha tambe) pa e acordeon por ta funciona optimal atrobe.

E por a torno un acordeon for di otro y hinca esaki restaura completo den otro y entregabo un acordeon casi nobo y cu lo dura pa años atrobe.

Sigur ta cu dos acordeonista grandi lo haya su falta y eseynan ta **Vicente Kelly** cu tabata tin Ety como **"su tecnico"** pa e variedad di acordeonnan cu e tin, y tambe **Vicente Tromp** cu tabata tin Ety banda di dje tur ora cu algo pasa su acordeon, pa no menciona otro acordeonistanan di nos isla.

Ety no tey mas, y e pregunta ta keda ?

Kende ta bay tuma su lugar. Kende nos tin aki pa haci e trabao aki? Manera Ety no tin, y awor ta Santo Domingo, Colombia of Venezuela lo mester bay pa laga drecha acordeonnan.

Mundo musical di nos isla a perde un gran personahe.

Ety na dos ocasion a ser homenajea durante festivalnan di Dande riba nos isla, na 1982 y 1983, e unico musico cu a logra e galardón aki dos aña consecutivo.

Awe tardi, Ety tambe ta ser hiba pa su ultimo lugar di sosiego.

GABRIEL FLORES

Y finalmente, tabata diaranzon atardi cu e noticia a dal tur hende di morto di **Gabriel Flores**.

Ayera mi a skirbi di Gaby, y lo usa mucho palabra awe riba e cantante, compositor y musico aki.

Dos persona cu sigur lo haya su falta ta **Maybeline Arends Croes** unda Gaby tabata busca su consehonan y a siña hopi, y tambe **Edwin Abath**, su amigo, y colega di **"pabao"**, awe politico.

Nos ta corda ainda cu net prome cu Pasco el a logra trece su gaita riba mercado, **"Piscador di hende"**, un gaita cu e tabata orgulloso di dje y a keda recorda semper **"e muchanan di rancho"**, e gaiteronan cu a imponi nan nomber di gaitero, cu e kier a homenajea cu **"Piscador di hende"**.

Na 1995 su exito cu a pega duro na emisoranan tabata **"Grandi bo ta"**.

Tres personahe musical cu Aruba a perde den un siman, cada un pa locual e tabata como persona. Cu tur tres sosega na paz.

July